

Počinke kreiranja Strategije prema mladima u Unsko-sanskom kantonu

Pokrenut je postupak izrade Strategije prema mladima u Unsko-sanskom kantonu. Vlada Unsko-sanskog kantona zadužila je Ministarstvo obrazovanja, nauke, kulture i sporta da od kantonalnih ministarstava, javnih ustanova i javnih preduzeća zatraži imenovanje predstavnika/ca u Radnu grupu za izradu Strategije prema mladima USK u periodu od 2016-2020. godine. Institut za razvoj mladih KULT imenovan je da, u saradnji sa Ministarstvom, pruži stručno-konsultativnu podršku u procesu izrade ove strategije.



Ovom zaključku Vlade USK prethodili su sastanci koje je Jasmin Bešić, izvršni direktor Instituta za razvoj mladih KULT, održao sa gosp. Izudinom Saračevićem, premijerom USK, te gosp. Damirom Hodžićem, predsjedavajućim Komisije za obrazovanje, nauku, kulturu, sport i mlade pri Skupštini USK i gosp. Kenanom Keserovićem, dopredsjedavajućim Komisije. Inicijativu za donošenje Strategije pokrenuo je gosp. Kenan Keserović, zastupnik u Skupštini USK.

Strategija, koja je i zakonska obaveza u svim kantonima FBiH, a čije su donošenje zagovarali i predstavnici Vijeća mladih USK, trebala bi precizirati jasne ciljeve i mjere brige vlasti o mladim ljudima.

Stečeni uvjeti za formiranje Vijeća mladih FBiH: U Grudama održana osnivačka Skupština Vijeća mladih Zapadnohercegovačke Županije

U Grudama je sinoć održana osnivačka Skupština Vijeća mladih Zapadnohercegovačke Županije. Ovo vijeće čine tri lokalna vijeća mladih - općina Grude i Posušje, te grada Širokog Brijega.

Za predsjednika Vijeća mladih Zapadnohercegovačke Županije izabran je Mate Lončar iz Posušja, a dopredsjednik je postao Josip Zelenika iz Širokog Brijega. Za predsjednika Skupštine izabran je Martin Kondža iz Gruda, a za njegovog zamjenika izabran je David Naletilić iz Širokog Brijega. Za tajnicu je izabrana Josipa Zorić iz Gruda.

Mate Lončar, predsjednik Vijeća mladih Zapadnohercegovačke Županije, istakao je da mladi Zapadne Hercegovine zaslužuju da imaju iste mogućnosti kao i ostali u Bosni i Hercegovini. „Udružili smo snage, radit ćemo onoliko koliko možemo, radit ćemo u skladu s našim mogućnostima i siguran sam da naš trud neće biti uzaludan“ – dodao je Lončar. Osnivačkoj Skupštini prisustvovala je i gđa Ružica Mikulić, ministrica obrazovanja, znanosti, kulture i sporta ZHK, koja je istakla da na mladima svijet ostaje i da trud ovih mladih ljudi da se izbore za sebe sigurno neće ostati nezapažen. U ime domaćina, općine Grude, obratio se službenik za mlade Općine Srećko Mikulić, koji je poželio sreću i uspjeh u radu Vijeću mladih.

Formiranjem Vijeća mladih Zapadnohercegovačke Županije, koje je šesto kantonalno vijeće u Federaciji BiH stekli su se uslovi za formiranje krovnog vijeća, Vijeća mladih

Federacije Bosne i Hercegovine. Osnivačkoj Skupštini prisustvovali su i predstavnici/e Instituta za razvoj mladih KULT.

SARAJEVO POLUMARATON: Humanitarna akcija „Trčite sa ciljem, prema cilju!“

Sarajevo polumaraton, u saradnji sa Institutom za razvoj mladih KULT, ove godine imat će snažan humanitarni karakter. „Trčite sa ciljem, prema cilju!“ – moto je humanitarne akcije koja za cilj ima prikupljanje sredstava za podršku projektima mladih koje su odabrali u Institutu za razvoj mladih KULT – Školi prijateljstva i Obrazovno-raznodnom centru za mlade SPAJALICA.



Za nešto manje od dva mjeseca, 20. septembra 2015. godine u 9 sati ujutro ispred BBI centra u Sarajevu, deveti put označit će se start Sarajevo polumaratona. Međunarodni je to događaj, koji organizuje Udruženje „Marathon“ Sarajevo, a koji je tokom devet godina izrastao u najmasovniji sportski događaja u BiH, u kojem je prošle godine učestvovalo više od 1200 trkača i trkačica iz 32 države.

Ta činjenica, tvrde iz Udruženja, Bosni i Hercegovini i njenom glavnom gradu,

donosi višestruku korist. „Izuzev ekonomske, ekološke i sportske dimenzije projekta posebno nam je važan humanitarni aspekt jer želimo unaprijediti društvo u kojem živimo. Trkači i sportisti generalno, poznati su kao izrazito dobri i solidarni ljudi“ - ističe Erol Mujanović, direktor Udruženja „Marathon“ Sarajevo, koje će ove godine, u saradnji sa Institutom za razvoj mladih KULT, prikupljati sredstva za podršku odabranim projektima mladih. Sportisti ali i gosti ovog sportskog događaja, ove će godine moći podržati rad Obrazovno-raznodnog centra za mlade SPAJALICA i Školu prijateljstva. „Zadovoljstvo nam je biti partner Udruženju Sarajevo „Marathon“, naročito u ovom humanitarnom dijelu sportskog događaja. Obrazovno-raznodni centar za mlade SPAJALICA jedan je od vodećih društveno odgovornih centara za mlade u zemlji, koji kroz razne aktivnosti, usmjerava i motivira mlade ljude. Pored SPAJALICE, prisutni će moći dobro djelo učiniti i za Školu prijateljstva koja okuplja djecu do četvrtog razreda osnovne škole, kojoj stručni tim pomaže u učenju, rješavanju problema ili socijalizaciji“ – istakla je Abela Purivatra iz Instituta za razvoj mladih KULT.

Svi polaznici se mogu registrovati putem web stranice www.sarajevomarathon.ba.

Uči, misli i djeluj online konferenciji u Srebrenici prisustvovali mladi iz cijele regije

U Srebrenici je, u organizaciji Udruženja "Prijatelji Srebrenice", a uz podršku Instituta za razvoj mladih KULT, održana i četvrta regionalna UMiD (Uči, misli i djeluj) online konferencija, namijenjena mladima u toj regiji.



Cilj konferencije je promocija i razvoj individualnih i timskih vještina kod mladih i buđenje samopoticaja na građanske aktivnosti, volontiranje, te samozapošljavanje.

Sudeći po broju prijavljenih, konferencija je izazvala veliko interesovanje mladih regije. Pored Srebreničana, konferenciji su prisustvovali mladi iz susjednih općina, iz Bratunca, Milića, Zvornika, te Vlasenice. Đorđe Deurić iz Doma mladih Zvornik kaže da je ova konferencija za njega bila vrlo dobro iskustvo. "Osnovni motiv je uvezivanje mladih ljudi i pokušaj da se aktivnosti koje se realizuju u našem okruženju, prikazuju u drugim mjestima. Da se pokušamo povezati - da mislimo dobro i da radimo dobro. Da budemo prepoznati kao neko ko želi da doprinese dobrom gradu i regiji, pa i šire. Nijedan ovakav događaj ne može ostati bez nekog iskustva koji će nas kasnije služiti u radu" - rekao je Đorđe.

Udruženje "Prijatelji Srebrenice" jedna je od četiri organizacije u Bosni i Hercegovini u čijim je prostorijama otvoren UMiD online centar, iz kojeg će mladi moći pohađati obuku koja im je predstavljena danas. "Želimo da damo priliku mladim ljudima da preuzmu inicijativu, da pokažu da su sposobni, odgovorni, da žele da se obrazuju, da napreduju i da kroz ovakvu jednu online obuku koja je predstavljena danas na UMiD konferenciji održanoj u Srebrenici, postanu omladinski lideri u svojim zajednicama, preuzmu inicijativu i utiču na sve važnije odluke u društvenoj zajednici" - istakla je Dana Bučalina, projektna koordinatorica u Udruženju „Prijatelji Srebrenice“. Odzivom mladih na konferenciju u Srebrenici jako su, ističu, zadovoljni predstavnici/e Instituta za razvoj mladih KULT. "Ovo je već četvrta konferencija koju održavamo u Bosni i Hercegovini. Prve tri konferencije smo imali u Velikoj Kladuši, Sarajevu i Jablanici. Obuka ima dvanaest modula. Ti moduli su vrlo opširni, kreirani da mladim ljudima budu interesantni, interaktivni. Neki od njih su projektni ciklus, pisanje projekata, pisanje CV-ja, samoosnaživanje, ljudska prava i mnogo drugih interesantnih tema" – poručila je Mirela Ajanović iz Instituta.

Konferenciji je prisustvovala i Biljana Rakić, zamjenica načelnika Opštine Srebrenica, koja je naglasila značaj ovakvih aktivnosti nevladinih organizacija, istaknuvši i podršku lokalne vlasti svim događajima koji doprinose kvaliteti života i aktivnosti mladih u ovoj opštini. Nakon što uspješno savladaju online obuku, mladi će postati omladinski lideri/ce koji će, na neki način, biti spona između lokalne zajednice i lokalne vlasti.

Prikupljen novac za opremanje prvačića iz Dječjeg doma Bjelave

Humanitarnom izložbom, na kojoj su prodavali svoje likovne radove, mališani iz Škole prijateljstva prikupili su nešto novca za svoje vršnjake iz Dječjeg doma Bjelave. Novac koji će im biti uručen u četvrtak, potrošit će se na kupovinu školskog pribora za jednog prvačića.

Prva humanitarna izložba polaznika Škole prijateljstva održana je ispred Obrazovno-raznodnog centra za mlade SPAJALICA i bila je, slažu se mališani i njihovi roditelji, jako uspješna.



Ova humanitarna izložba inspirisana je Svjetskim danom prijateljstva koji se od 2011. godine obilježava 30. jula. Proglasio ga je UN s vizijom da prijateljstvo među ljudima, zemljama, kulturama i individualcima može stvoriti uslove mira i graditi mostove među zajednicama.